

講一 e5 影，生一 e5 囡

有人看著「某乜人仔的查某囡抱一 e5 囡仔」，一傳再傳，傳到尾仔，變成「某乜人仔的查某囡，猶袂結婚，著生一 e5 囡仔」，這就是「講一 e5 影，生一 e5 囡」，謠言的可怕著佇遮。

khia7 科學的角度來看，謠言若成真，是人類的福音。像百外年前的人，若講「我佇台灣看著馬克吐溫佇紐約講話」，人一定講你嚟湍嚟觸，講你「看一 e5 影，生一 e5 囡」。曷若現代人咧，講家已是千里眼、順風耳，佇台灣看著「米國總統候選人奧巴馬和羅姆尼的辯論」，人會感覺你囉哩囉唆加講話，因為三歲囡仔嘛看會著---佇電視看著。

毋過，2012 年，石油大起價，有人哭呻：

「對今仔日起，我的轎車欲改食空氣著好！」

10 月，就有「聽一 e5 影，生一 e5 囡」的英國科學家宣布：

「阮有才調對空氣中提煉二氧化碳，對水中提煉氫氣，混合遮的元素生產出汽油；目前已經生產五公升。」

哇，真正是大好的消息，當等空氣汽油大量生產，成本降低，低過一般汽油的時，你開車出門共人講：

「我的轎車食空氣的！」

彼當陣，就無人會恥笑你：

「講一 e5 影，生一 e5 囡！」